

Pìndulas de lingua sarda

Su sardu e s'italianu, s'iscit, funt linguas sorrìs, est a nai ca funt fillas de sa pròpriu mamma, su latinu, chi est arribbau in s'isula nosta cun is Romanus, in su 238 innantis de Gesugristu, e de insaras abellu abellu at incumentzau a s'ispainai in ònnia logu. Su fatu istat ca, comentì acuntessit po is cristianus, mancaì siant sorrìs, is duas linguas s'assimbillant meda ma non funt ugualis.

Me in is diferèntzias morfu-sintàticas intra de sa grammàtica de su sardu e cussa de s'italianu ddui agataus su chi is linguistas nant "acusativu prepositzionali" o "marca diferenziali de s'ogetu". Candu in una fràsia sarda, francu calincuna diferèntzia de unu logu a s'atru, su complementu ogetu tenit su sentidu de sa [+animadesa] e/o de sa [+umanidad], insaras ddui depeus sèmpiri ponni ananti sa prepositzioni simpli "a". Esemprus: naraus "ariseru apu biu a tziu Loisu", ma "ariseru apu biu sa bicireta noa de tziu Loisu". Sigumentì tziu Loisu est una criadura animada (ca bivìt, si movit, papat, etc.) e in prus est unu cristianu (est a nai una persona umana), in sardu ddi poneus ananti sa prepositzioni "a", cosa chi non fadeus cun su complementu ogetu "bicireta", chi non est ne animau (a sola, de sei, sa bicireta non si movit!), ne est unu cristianu. Est po cussu chi is fràsias "ariseru apu biu tziu Loisu" e "ariseru apu biu a sa bicireta noa de tziu Loisu", in sardu, funt isballiadas e non fait a ddas nai.

Su chi depeus istai a s'avèrtia nosu sardus est candu fueddaus in italianu, ca in custa lingua ananti de su complementu ogetu non ddui bollit prepositzioni peruna. In Sardinnia, invècias, acostumaus a nai "ieri ho visto al signor Luigi", "chiama a tuo zio", "ho ascoltato attentamente al professore" e atras espressionis simbilis, chi in italianu istandard funt isballiadas.

Po nd'isciri de prus asuba de sa marca diferenziali de s'ogetu o acusativu prepositzionali ligi a Ignazio Putzu, *L'accusativo preposizionale in sardo campidanese. Aspetti tipologici e contesti areali*, in Antonietta Dettori (a contivigiù de), *Lingue culture in contatto*, Roma, Carocci, 2005, pagg. 225-260.

Novas marrubiesas inderetura a domu!

S'arregordat ca *Novas marrubiesas* podit essi arriciu inderetura a domu cun una e-mail: bastat a ddu pediri mandendi una punta de billetu eletrònicu a s'indiritzu servitziu.linguisticu@comunemarrubiu.it, iscriendi su nòmìni e su sangunau e "bollu arriciri *Novas marrubiesas*".



Comunu de Marrùbiu
Provìncia de Aristanis

Sa redatzioni de *Novas marrubiesas* est contivigiada de su Servitziu linguisticu sardu de su Comunu de Marrùbiu (operatori Antoni Nàtziu Garau).

S'isportellu linguisticu est a dispositzioni de citadinus, maistus de iscola, professoris e istudentis po cali si siat informatzioni, profundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscidura de su sardu. Su Servitziu aperit:

	de	a
sa giòbia	mesudì	is duas
sa cenàbara	is otu	is duas

Telèfunu: 0783.8553312
E-mail: servitziu.linguisticu@comunemarrubiu.it



Comunu de Marrùbiu
Provìncia de Aristanis

www.comunemarrubiu.it

Novas marrubiesas

Newsletter periòdica de informatzioni istitutzionali de su Comunu de Marrùbiu

Annu I, n. 4

Acabbau su 3 de su mesi de argiolas de su 2009

Marrùbiu si cunfirmat bidda de isport. Grandu sucessu po is manifestatzionis “Birbantibici” e “All Star Day”: prus de milla is ispetadoris chi ant sighiu is fainas de de sa mountain bike e de su basket.

Ca Marrùbiu fessit una bidda de isport, s'iscidiat e non de oi. Est po cussu chi is duas manifestatzionis apariciadas in bidda su 20 de su mesi de làmpadas passau ant arriciu s'agradessimentu de genti meda, chi s'est mòvia a tròporas po ddas sighiri.

Sa primu, totu sa dii, fiat su “All star Day”, sa giorronada cun is isteddus de s'isport sardu e internatzionali apariciada de su Comunu de Marrùbiu cun sa Federatzioni Italiana Pallacanestro, su C.O.N.I., sa Provìncia de



Aristanis, sa Consulta de is Piciocheddus, sa Pro Loco, su Sòtziu Polisportiva e su Centru Minibasket de Marrùbiu. A mengianu su cunvènniu “Poneusi in giogu”, cun is arrelatas de

su mediadori sotziali Larentzu Bràina, de sa campionessa de sàrtiu longu Valentina Uccheddu, de su campioni di isci de àcua Jeff Onorato, e de su prèsi de su Clàssicu “De Castro” de Aristanis, Guidu Tendas.

A pustis pràngiu s'est incummentzau cun unu seminàriu de aggiornamentu po is allenadoris de basket de totu sa Sardìnnia (maistu fiat Pedru Carlini), sighiu de sa gara de tiru de tres puntus, binta de Danieli Porqueddu, e de sa partida “Totu is isteddus de Sardìnnia” intra de un'isceberu de giogadoris de sa Sèrie C contras a una representàntzia de sa Sèrie D. Po sa crònaca, ant bintu cussus de sa Sèrie C, fadendi 109 puntus sendi chi is atrus si funt firmaus a 93.

Ma, sa pròpriu dii, non si funt bidas provas de basket bellu isceti, ca a su merì, me in sa pista de sa zona isportiva, ddui fiat sa de tres editzionis de “Birbantibici”, una gara de mountain bike cuncordada aintru de su campionau regionali de sa sotziedadi de is pitieddeddus, cun s'agiudu de su sòtziu “Ossidiana bike”, de su Cumitau sardu de sa Federatzioni Ciclistica Italiana e de su Comunu de Marrùbiu. Est istètiu diaveras un'ispàssiu su biri 101 piciocheddus chi, a pustis de ai incosciau sa bicireta, ant arregalau a prus de 500 ispetadoris un'ispetàculu praxili. Che a cuddu film nodiu de is calleddus dalmatas biancus a margas nieddas, fait a nai ca est istètia propriamenti una “càrriga de is 101”: sa pròpriu bolla de cresci fortis e

sanus, de andai a innantis, de fai fortza paris, de s'agiudai de pari a pari; su pròpriu ispiritu de grupu e de socializatzioni. Marrùbiu si podit fintzas bantai de tenni su campioni sardu de sa categoria esordientis, Filipu Coni, 13 annus: est una promissa po sa mountain bike e po su



ciclismu de totu sa Sardìnnia.

Sa pròpriu esperièntzia s'at a torrai fai su 25 de custu mesi in Bobadri, cun s'iniziativa “BirbantibiciMarmidda”.

S'isport, calisiat isport, si cunfirmat una pràtiga sana chi non serbit a su corpus, a sa personi isceti, ma fait profetu fintzas a su sentidu, a sa menti, a s'òmini. Chentza de cunsiderai su valori sotziali artu chi tenit e s'importu po s'educatzioni, ca afòrtiat su sentidu de su trabballu a cumoni, de iscuadra, e s'arrispetu de is arrègulas, in un'ispiritu de cumpetizioni sana chi ammelliorat a is isportivus e totu sa sotziedadi.